

OSASUNA. Mendigurenek dio odola emateaz soilik larrialdietan gogoratzen garela, euskararekin bezala

Odol Emaileen Elkartearen lekukoa Kontseiluarentzat



GARI GARAIALDE / ARGAZKI PRESS

Lekukoari eutsi, egin odol emaile kanpainaren barruan, Euskaren Gizarte Erakundearen Kontseiluak hartu zuen lekukoa, aurretik Gipuzkoako Foru Aldundiak eta Euskal Herriko Unibertsitateak egin duten moduan. Hala, Kontseiluak bat egin du kanpainarekin, eta Odol Emaileen Elkarteko presidente Sabin Urzelaik azaldu zuenez, «aurrerantzean beste gizarte eragile batzuen inplikazioa bilatzea da helburua». Kontseiluko idazkari nagusi Xabier Mendigurenek odola eta euskara parekatu zituen. «Odola emateaz ez gara gogoratzen egoera larrietan ez bada; hizkuntzarekin gauza bera geratzen da, larri daudenean hasten baikara irtenbideak bilatzen».

EUSKARA. Iaz eskola kirolaren arloa landu zuten; aurtengoa planaren bigarren atala da

Federazio eta klubetara eramango du Aldundiak Euskaraz Kirolari programa

Gipuzkoako federazio guztiekin elkartu, eta bakoitzarentzako plana egiteko asmoa du Aldundiak

Eider Goenaga | DONOSTIA

Euskaraz Kirolari programa iaz abiatu zuen Gipuzkoako Foru Aldundiak, eta aurten planean jasotako bigarren urratsa emango dute: Plana kirol federazio eta klubetara txertatzea.

Euskara Zuzendaritzak eta Kirol Zuzendaritzak elkarlanean prestatutako plangintzak hiru arlotan eragitea du helburu. Eskola kirolari dagokion arloa 2001-2002 ikasturtean hasi ziren lantzen; aurtengo ikasturtean federazio eta klubekin hasiko dira lanean; eta 2003-2004 ikasturtean kirol instalakuntza eta kiroldegien arloa jorratzeari ekingo diote.

«Euskararen aldeko sentsibilizazio kanpaina hau guztia Gipuzkoako herri eta bailara egiturek egiten duten lana eta duten errealitatea kontuan hartuta egingo da. Alegia, ez da goitik beharako plana izango; jada lanean ari direnekin elkarlanean, kanpainari indar gehiago ematea baita gure helburua», adierazi zuen Lorea Leanizbarrutia Foru Aldundiko Euskara zuzendaria.

Luis Mari Bandres Kultura, Euskara, Gazteria eta Kirol diputatuak «ezinbestekoa» iritzi zion kirol munduan lanean jarduten duten guztien inplikaziora, «soilik horrela lortuko baita

esparru guztietan euskararen sustapena eta normalizazioa gauzatzea».

Federazio bakoitzari bere plangintza

Ikasturte honetan egin nahi duten lanaren nondik norakoak Kote Olaizola Kirol zuzendaria azaldu zituen. *Euskaraz denok irabazle* lelopean egingo dute kanpaina, eta hainbat urrats egingo dituzte ezarritako helburuak betetzeko. Asmoa Gipuzkoako kirol federazio guztiekin «harreman zuzena» izatea da eta, horien bidez, zeharka klubetara eragitea. «Izan ere, federazioak erreferentzia dira kirol arloan, baina klubak dira herritarrekin tratatu zuzena dutenak, eta benetan euskararen normalizazioan eragin dezaketenak», azaldu zuen Olaizolak.

Metodologiari dagokionean, Olaizolak azaldu zuen aurkezpenean bilera bat egingo dutela federazioekin, horien inplikazioa lortzeko asmoz. «Ondoren, bakoitzaren egoeratik abiatuta, federazioaren aukerak eta autoinplikaziorako proposamenak aztertuko ditugu. Diagnosi bateratu bat landuko dugu, eta bakoitzak bere aukeren arabera konpromisoak hartuko ditu. Klubei federazioak hartutako konpromisoak ezagutaraztea izango da hurrengo urratsa».

PLANGINTZAREN LAN ARLOAK



EGUNKARIA

IDATZIZKO MATERIALA. Idatzizko kirol materiala sortu, argitaratu eta zabaltzea; kirol munduan dauden espezialitateetako hiztegi eta berezitasunak euskaraz ere izan daitezkeen.

ERAGILEAK. Begirale, entrenatzaile, epaile eta gainerako eragileek gai izan behar dute euren lana euskaraz egiteko, eta horretarako ikastaroak antolatu ditu Aldundiak.

FEDERAZIO ETA KLUBAK. Kirol federazio eta klubek herritarrekin zuzeneko tratua izaten dute, beraz, horietan euskararen erabilerara sustatzea eginkizun gisa hartu du Aldundiak.

KOMUNIKABIDEAK. Hedabideetako kirol albiste eta emankizunak gero eta gehiago euskaraz izatea.

GIZARTEA. Kirolzale oro sentsibilizatzea, kirola egiten duen garaian euskara erabili dezan.

Prentsaurrekoan Agustin Aranzabal Realeko kapitaina, Naroa Agirre pertika jauzilaria eta Mikel Amenabar Gipuzkoa-

ko Pilota Federazioko lehendakaria izan ziren, eta bat etorri ziren Foru Aldundiaren asmoekin.

BARDEA

Tiro poligonoari irtenbidea bilatzen ari zaiola dio Espainiako Gobernuak

Agentziak | MADRID

Espainiako Gobernuak Defentsa ministro Federico Trillok atzo Senatuan adierazi zuenez, bere Ministerioa lanean ari da Bardeako tiro poligonoarentzako konponbide bat bilatzeko.

Eusko Alkartasunako (EA) Inmaculada Boneta diputatuak egindako galdera bati erantzunez egin zituen adierazpenak Trillok. Bonetak Bardeako tiro poligonoarentzako kokaleku alternatiboa bilatzen ari ote diren galde-tu zion Espainiako Gobernuari.

Hala ere, Federico Trillok gogorarazi zuen Defentsa Ministerioak eta Bardeako Batzordeak hitzarmena sinatu zutela, iragan ekainaren 8an, armadak 2008. urtera arte tiro poligonoa erabili ahal izateko, eta, bien bitartean, irtenbideak bilatzen joateko. Nabarmendu zuen ere, hitzarmen horren bidez nabarmen igo zela Bardeako Batzordeak jasotzen duen diru kopurua.

Ildo horretan, Trillok esan zuen orain dela gutxi Miguel Sanz Nafarroako Foru Erkidegoko lehendakariarekin elkartu zela, eta bilera horretan jaso zuela Sanzek Defentsa Ministerioak egindako «esfortzuen» berri. «Esfortzu horiek Espainian zein Espainiatik kanpo egiten ari gara. Baina, ez ezazu zalantza izpirik izan, hartutako konpromisoak betetzeko bidean ari garela lan egiten», gaineratu zuen Defentsa ministroak, Bonetari zuzenduz.

«Gaiaren gaineko jarraipena egingo dugu»

Bonetak adierazi zuen Espainiak eta NATOk egiten dituztela praktikak Bardean, eta guztiek sartu behar dutela konponbidearen barruan. «Hala ere, gustuko ditut ministroaren adierazpenak; baina, jakin ezazue gaiaren gaineko jarraipena egingo dugula, konpromisoak egia bihurtzen direla ziurtatzeko», gaineratu zuen EAko diputatuak.